

Date – 13/05/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. India leh Pakistan inkar boruak a chhiat avanga Bangladesh ramri khar chuan Mizoram sorkar sawhthing hralh chhuah a nghawng mek.
- 2. Ni 2/3 kalta chhunga ruah sur avangin Aizawl khawpui hmun hrang hrangah kawlphetha pek chhuah a khaihhlak.
- 3. Prime Minister Narendra Modia chuan firfiakte do kawngah Operation Sindoor chuan tihdan phung thar a tichhuak tih a sawi.
- 4. PM Modia chuan nuclear ralthuam hmanga invauna chu ngaihnam mai an tum lo tih a sawi.

<><><>

GINGER MARKET

India leh Pakistan inkar boruak a chhiat avanga Bangladesh ramri khar chuan Mizoram sorkar sawhthing hralh chhuah a nghawng mek.

Akashvani Aizawl zawhna chhangin, Mizoram atanga sawhthing thawngchhuah lam buaipuitu, Starfarm CEO Pi Malsawmi chuan Bangladesh chu India atanga sawhthing leichhawngtu lian ber a ni tih a sawi a. India leh Pakistan inkar boruak a chhiat avanga Bangladesh-in ramri a khar nghal avangin India ram chhung hmun hrang hranga sawhthing thar chhuah an chhekkhawh sa te chu a inhnawhkhawm vek a, hei hian Mizoram atangin ram chhung khawpui lian hrang hrangah te sawhthing an hralh theih loh phah niin a sawi a, India leh Bangladesh ramri khar hnu-ah sawhthing man a tlahniam char char tih sawiin, tun dinhmuna Delhi Mandi-ah chuan sawhthing kg 1-ah cheng 28 vel a ni mek a, Mizoramin a hralhna Silchar leh Siliguri-ah te chuan kg-ah 17 velah a tlahniam tawh niin a sawi.

Pi Malsawmi chuan ram chhunga sawhthing man tlahniam ta lutuk chu Mizorama pawhin a tuar nasa chho zel nia a hriat thu sawiin, loneitute leh Mizoram sorkar support price thlengin a nghawng vek a ti a, Kumin February ni 20 atanga Mizoram sorkar sawhthing lei thawh khatnaa sawhthing te chu hralh zawh loh tlem te chauh a awm tawh a, hetihlai hian April ni 21 atanga sawhthing lei thawh hnihna erawh chu ruahsur vang leh India leh Pakistan indo avanga ramri khar avangin thawng chhuah lamah harsatna an tawh chho mek a, Mizoram sorkarin secondary collection centre (SCC) a siam a sawhthing chhekkhawh te tihral chu a harsat a rin thu a sawi bawh a ni.

Byte: Pi Malsawmi

Police hotute hnen atanga Akashvani Aizawl thu dawn danin tun hnai khan Mizoram Police hotute leh he ta paramilitary force, central armed police force leh intelligence pawl aiawhte chu Aizawlah an inhmukhawm a. Km 318 a thui Mizoram leh Bangladesh ram inrina vengtu Border Security Force (BSF)-te chu ramri ven kawngah uluk leh khauh leh zuala thawh tura hriattir an ni. Pakistan hian Bangladesh a firfiak pawlte hmang tangkai-in India ram tihbuai a tum ni a thudawn a nih avangin Bangladesh ramri-ah hian venhimna khauh zawka kalpui ni se tih a ni a, chutiang a hmala tur chuan BSF te hrihl an ni.

Hemi hma hian intelligence pawlte leh venghimtu sipaite chu Bangladesh nena ramri-a venhimna ngawrh zawka kalpui tura hriattir an lo ni tawh a. Meghalaya sorkar phei chuan ramri hrulah hian zan curfew a puang mek a. Pakistan enthlatu pawl ISI mite leh Pakistan sipai officer engemawzat Bangladesh a tirhluh an nih avang leh Bangladesh sorkar hawihar enin venhimna hi khauh zawka kalpui a ni.

(Corr: maremi)

FIR

Khawzawl khawpui tana luitui a chhuk zawnga tuilakna tuidawt chhu chhia a tui lo la rute lakah PHE Department chuan Khawzawl Police Station-ah FIR an thehlut dawn.

Thla hlui ni 18 a chhe tawh Khawzawl khawpui chawmtu Greater Khawzawl Water Supply Scheme a tui pump khawl chhia chu siamthat ala ni lova.Hetihlai hian Khawzawl chhak tlang atanga lui luang hmanga tuilakna dawt lo chhu chhia a tui lo la rute lakah FIR an thehlut dawn niin PHE department hotute’n an sawi. PHE WATSAN Division, Khawzawl chuan thuchhuah siamin GKWSS tui pump khawl chhia hi Guwahati Workshop-ah siamthat tumin buaipui mek a nih thu an sawi a. Tun dinnmunah tlang sang lam lui luang thla tui lakte chauh sem theih a nih thu leh he tianga tui lakna dawt chhu chhia a, mahni huan leh lova pawtru engemawzat an awm tih sawiin hei hian tui sem chhuah tur a tih khaihlak phah fo a ni an ti a.Hei hi thil awm dan a nih avangin he’ng mite lakah hian vawiin-ah FIR thehlut an tum tih an sawi a ni.

Khawzawlah hian chhungkaw tamtakin tui an lei tawh a.Tunhnaia ruah tla avangin tlang atanga luang thla luite hmanga tuilakna-ah te tui a haw leh theih tawh avangin a theih angin veng hrang hrangah a inchhawkin tui sem chhuah a ni a. Chhungkaw khatah litre 2,000 zelin an sem rual a ni.

(Lalsangpuii, PTC Khawzawl)

POWER DISRUPTION

Ni 2/3 kalta chhunga ruah sur avangin Aizawl khawpui hmun hrang hrangah kawlphehta pek chhuah a khaihlak nasa hle.

Power & electricity department thuneitute hnen atanga thu dawn danin ruahsur leh thli tleh avangin electric ban tlu leh a bana kangmei chhuak report an dawng nual a. Veng hrang hrang engemawzatah kawlphehta pek theih a ni lova, ruahsur a ban deuh lai-in thawk mah se, a sur chhunzawm zel avangin hna thawh harsa an tih thu an sawi. Hmun thenkhatah thin tlu leh thingzar tliakin electric sem chhuahna hrui a vuak chhiat avangin harsatna an tawk bawk a. Tun dinhmunah a chhe nasa zual tih loh chu an siamtha chho zel niin an sawi a. Transformer chhia pawh engemawzat a awm ni a thudawn a ni.

Ruah tui avangin electric ban engemawzat-ah electric current a kal a, chu chuan harsatna a siam nual niin an sawi bawk a ni

(Desk)

CONGRESS MLA

Congress MLA neih chhun Lawngtlai West bialtu Pu C. Ngunlianchunga chuan Lawngtlai helna tur kawngpui sial chungchanga sum eiru-a puh a nihna-ah bail lak lawk a tum loh thu a sawi.

Nimina Trained Nurses Association of India, Lawngtlai District Branch-in International Nurses Day an lawmna a khuallian, Pu C. Ngunlianchunga chuan he thubuai-ah hian bail lak lawk a tum loh thu sawi-in a tul chuan lungina tan a inhuam thu a sawi a ni. Lawngtlai khawpui helna tur kawngpui siam chungchangah hian thil fel lo a awm ni a hriat chungchangah he hna buaipui tanlaiin LADC a chief executive member (CEM) a nihlai a nih thu a sawi a. A thubuai chu sorkar in court rorelna lam ah ngaihtuah a remti tih sawiin, a thubuai neih chu eirukna, hlemhletha lam a ni lo niin a sawi thung. Ram neitute tlawmngai tura a ngen thu leh a hnu lamah he Project hi a puitling lo zui nen thuneihna hmang suala puh a nih thu a sawi a. Assembly House a a lo sawi tawh angin, eirukna a ni emaw, thuneihna hman sualna ah pawh inhnamhnawihna a neih a hriatloh thu sawiin bail lak lawk a tum loh thu a sawi a ni.

Pu C. Ngunlianchunga thubuai hi Anti Corruption Bureau (ACB) chuan chhui zovin court-a a chungchang ngaihtuah a nih theih na'n sorkarah phalna 'prosecution sanction' an dil a. Chu dilna chu pawmin larsap chuan court-a ngaihtuah phalna hi a pe a. Hei hi LADC CEM a nih lai a puhmawhna a nih avangin district council & minority affairs department chuan April ni 29 khan prosecution sanction pekna thupek hi larsap aiawhin a tichhuak a ni. Pu C. Ngunlianchunga thubuai chhuitu ACB chuan IPC section 120B/409/34 leh Prevention of Corruption Act, 1988 section 13 (1)(a)(b) leh 13 (2) tlawchchanin thubuai hi an ziaklut a ni.Pu C.Ngunlianchunga chuan LADC a sorkar a kal mumal theilo leh sorkar din na’na thil kalpui dan chu hnam tan mualphona a ni a ti a. Sorkar nghialnghet a awmtheih na’n Anti Defection law neih chu thil pawimawh tak a nih rualin, duh duha neih maitheih a nilova, he dan hi neitura beih a tul a tih thu a sawi a ni.

(Lalnggheta Ralte, PTC Lawngtlai/Desk)

ASF

Kumin March ni 20-a Guwahati laboratory a endikna a Lawngtlai leh Zawlnuam khawpui a vawk damlo leh thite African Swine Fever (ASF) vang a ni tih nemngheh a nih atang khan Mizoramah vawk 3,883 a thi tawh.

AH & Vety department hotute sawi danin kumina ASF vawk pulhri a leng tan leh tih finfiah a nih hnu-ah Pathianni kha ni khata vawk thi awm leh lohna hmasa ber a ni a, vawk suat report a awm lo bawk. Chutih lai chuan nimin khan Siaha khawpui a veng 10-ah vawk 29 a thi leh a. Vawk thi zawng zawng 3,883 a 2,278 hi Siaha khawpui ami a ni a, Lawngtlai khawpui-ah vawk 1,337 thi tawhin Zawlnuam khua-ah 173 a thi tawh a, Lunglei khawpui-ah 73 a thi tawh bawk a. Siaha, Lawngtlai, Zawlnuam leh Lunglei khawpui a veng 53-te chu ASF vawk pulhri lenna hmunah Vety departmen chuan an puang mek a ni.

Hetih lai hian nimin khan Siaha-a veng 2-ah vawk 12 suat a ni a, Lunglei-a veng 1-ah vawk 2 suat a ni bawk a, nimina vawk suat zat hi 14 a ni. Heti hian kumina ASF vawk pulhri a len thar leh hnu-ah vawk1,168 suat a ni tawh a. Siaha khawpui-ah vawk 756 suat tawhin Lawngtlai-ah 315 suat a ni tawh a. Mamit district a Zawlnuam khua-ah leh Lunglei-ah 78 ve ve suat a ni tawh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan firfiakte do kawngah Operation Sindoor chuan tihdan phung thar a tichhuak tih sawi. Nizana ramchhung mipuite hnena a thusawinaah he thu hi sawiin Pu Modia chuan India sipaiten Operation Sindoor beihpui an thlak chu a hming ringawtah tawp loin rampum mipuite thinlung sosang leh chhelna puanchhuahna a ni a ti a. Rorelna dik awm tir tura beihpui thlakna a ni tih a sawi.

PM Modia chuan nuclear ralthuam hmanga invauna chu ngaihzam mai an tum lo tih sawiin India laka firfiaka chetna chu na taka chhanlet a ni ang a ti a. An chhanletna pawh ramin a duhdan tak a ni dawn tih a sawi a.

Pu Modia chuan Pakistan-in inkahna titawp turin India a ngen a, mahse Idnia chuan an pawikhawih thin an tih tawp hunah chauh inkahhai hi a remti tih a sawi.

Prime Minister chuan sipaite, intelligence agency-te leh Scientist te chu zahna chibai a buk a. An huaisenna leh inpeknate chu ramchhunga hmeichhia zawng zawngte tan a hlan a ni. Pu Modia chuan Pakistan na tak demin firfiak chetna an chhui chian hnuah Pakistan-a Bahawalpur leh Muridke ah te an chhui tawp zel a ti a. Heng firfiakte hmunhma hi Pakistan chuan a tihchhiat vek a ngai tih sawiin an ti chhe lo anih chuan an tan kawng dang a awm thei tawh lo a ti a. India leh Pakistan te an inbe dawn anih chuan firfiaka chetna chungchang leh Pakistan Occupied Kashmir chungchangah chauh a awm thei ang tih a sawi a. Pu Modia chuan firfiakte laka zahngaihna neihloh tawp chu khawvel tha zawk neih theihna tur anih thu a sawi bawk a ni.

(Newsonair)

<><><>